

Urtsu Larre (Urtsular)



AIERBE LASA familia

URTSULAR Urtsu-Erreka auzoan dago (lehen *Urreta* auzoa). *Urtsular* Zaldibin urrutien dagoen baserrietakoa da, herritik lau kilometrora eta Abaltzisketako mugatik berrehun metrora. Itsas mailatik gora 431 metrora. Bere inguruko baso eta zelaiei izenen artean dauzkagu *Amizti*, *Erleand*, *Aiztialde*, *Murko ordeka*, *Langatxo*, *Pagari-txiki*, *Suialde*.

Bertakoek diotenagatik baserriaren izenak zerikusia du “ otsoen larre “ izatearekin, baina etimologiaz Urtsu auzoko larreetatik eratorria da, eta Aralar-ek bezala larre-k -e galdua du. Itxura guztiak dauzka, kontuan hartuta auzo horretan zenbat baserrik duten zerikusia toponimoarekin: *Ursubi*, *Urtsu Haundi*, *Urtsu Goena*, *Urtsuegi*...

Familia honen izengoitia *Zorrotza* da.

Auzoko bidea eta etxera bitartekoa 1969an egin zen. Elizara bidea ordubetekoa da, eta etxean aritu izan dira denak lanean, 1950 inguruan, Juan eta Patxi Fabrika Handian lanean hasi bitartean.

1924ko azaroaren 27an ezkondu ziren Zaldibin Salustiano Aierbe, Zaldibiko *Urreta Etxeberrikoa*, eta bertako alaba Maria Antonia. Etxean egin otordua eta bidaia Arantzazura eta Loiolara egin omen zuten. Ezkondu zirenean etxean bizi ziren artean, aita-amak eta hiru anaia-arreba eta bertan jarraitu zuten hogeitahogeita bost urtez. Hamaika seme-alaba izan zituzten: Maria, Pedro, Joan, Bonifazio, Joxepa, Anttoni, Patxi, Angelex, Ximon, Joxe eta Jexux.

Urtsularkoak etxejabe dira eta 1960an egin zituzten obra nagusiak, sukaldea eta komuna berrituz.

Sei-zazpi behi bazituzten eta etxerako egiten zuten artoa, garia, babarruna eta patata. Feriara, berri, eramaten omen zuten gazta, arrautzak, konjua, oilaskoa eta gaztainak.

Baserriaren arrastoa idatzietan

Zaldibiko erretaulako tratatzailea Joan Urtsularkoa izan zen. Historiak dioenez Gaintzako semea. Baina *Urtsular* Gaintzako mugan dagoela kontuan hartuta, agian, Urtsularre Zaldibiko etxearen jatorria ere izan zitekeen, hainbestetan aipatzen baita etxeiko izena abizen gisara. Hala ere, Gaintzako izatera ere, ezin kenduko diogu meriturik.

Informazio emaila: Maria Angeles Aierbe



AIERBE LASA familia

Goiko ilaran ezkerretik eskubira: Joxepa, Pedro, Joan eta Anttoni

Erdiko ilaran ezkerretik eskubira: Patxi, Salustiano Aierbe (aita), Maria, Maria Antonia Lasa (ama), Angelex

Beheko ilaran ezkerretik eskubira: Joxe, Jexux eta Ximon.

Familia osatzeko Bonifazio falta da.



Urtsular baserriaren ingurua.